

ՀՈՒՇԻՆ ՀԱՅՈՑ
ՔԱՂԱՔԱԿՐԹՈՒԹՅԱՆ
ՕՐՐԱՆ

ՀՏԳ- 941 (479.25):325

ԳՄԳ- 63.3(2Հ)+66.3(2Հ)

Շ 973

Գիտաժողովը նվիրվում է

Շուշիի ազատագրման 15-րդ տարեդարձին

Տպագրվում է գիտաժողովի խորհրդի որոշմամբ

Պատասխանատու խմբագիր՝

Արտակ Մադալյան

Գիտաժողովի ծրագրային կոմիտե՝

Արամ Սիմոնյան – ԵՊՀ ռեկտոր, Վլադիմիր Բարխուդարյան – ՀՀ ԳԱԱ հայագիտության և հասարակական գիտությունների բաժանմունքի ակադեմիկոս քարտուղար, Բաբկեն Հարությունյան – ՀՀ ԳԱԱ ակադեմիկոս քարտուղար, Աշոտ Մելքոնյան – ՀՀ ԳԱԱ պատմության ինստիտուտի տնօրեն, Ռուբեն Սաֆրաստյան – ՀՀ ԳԱԱ արևելագիտության ինստիտուտի տնօրեն, Արարատ Աղասյան – ՀՀ ԳԱԱ արվեստի ինստիտուտի տնօրեն, Պավել Ավետիսյան – ՀՀ ԳԱԱ հնագիտության և ազգագրության ինստիտուտի տնօրեն

Շ 973 ՇՈՒՇԻՆ ՀԱՅՈՑ ԶԱՂԱԶԱԿՐԹՈՒԹՅԱՆ ՕՐՐԱՆ: Շուշիի ազատագրման 15-րդ տարեդարձին նվիրված գիտաժողովի նյութեր: – Երևան, ՀՀ ԳԱԱ «Գիտություն» հրատ., 2007, – 370 էջ + 1 էջ ներդիր:

ԳՄԳ- 63.3(2Հ)+66.3(2Հ)

ISBN 978-5-8080-0715-4

© ՀՀ ԳԱԱ «Գիտություն» հրատարակչություն, 2007

ԱՐՏԱԿ ՄԱՂԱԼՅԱՆ
 ՀՀ ԳԱԱ պատմության ինստիտուտ

ՊԱՏՄԱԳԻՐ ՀԱԿՈՐ ՉԱՔԱՐՅԱՆԻ ՏԵՂԵԿՈՒԹՅՈՒՆՆԵՐԸ ՇՈՒՇԻԻ ՄԱՍԻՆ

Արցախի XVIII դ. երկրորդ կեսի և XIX դ. սկզբների պատմությունն արտացոլող սկզբնաղբյուրների շարքում կարևոր տեղ է գրավում Երուսաղեմի միաբան Հակոբ սարկավազ Չաքարյան Շուշեցու «Պատմութիւն գաւառին Արցախու» պատմագրական երկը՝ գրված «յամին 1853 ի սուրբ Երուսաղէմ»¹, որի ձեռագիրը պահվում է Երևանի Մաշտոցի անվան Մատենադարանում, 2734 թվահամարի տակ: Այս ձեռագրից XX դ. սկզբին կատարված մի ընդօրինակություն պահվում է Մատենադարանում 10659 համարի տակ: Հ. Չաքարյանի պատմության մեկ այլ արտագրություն՝ կատարված Մատենադարանի արխիվի նախկին վարիչ Հ. Աբրահամյանի ձեռքով, գտնվում է Մատենադարանում պահվող նրա անձնական ֆոնդում²:

Սույն աշխատության հեղինակ Հակոբ Չաքարյանի մասին քիչ բան է հայտնի: Անհայտ է նաև նրա ծննդյան թվականը, սակայն հեղինակը նշում է, որ իր նկարագրած դեպքերից «յոյժ սակաւուցն ի յետին ժամանակի ականատես լեալ» (էջ 376): Այստեղից կարելի է ենթադրել, որ նա ծնվել է XIX դարի 10-ական թվականներին: Հակոբ Չաքարյան Շուշեցին 1851-1865 թթ. եղել է Երուսաղեմի միաբան և այնտեղ 1853 թ. գրել «Պատմութիւն գաւառին Արցախու» պատմա-

¹ *Հակոբ սրկ. Չաքարեան, Պատմութիւն գաւառին Արցախու, Մատենադարան, ձեռ. 2734, էջ 1*: Այս երկի հրատարակությունը մեր առաջաբանով և ծանոթագրություններով տես *Մաղալեան Ա., Հակոբ Չաքարեանի «Պատմութիւն գաւառին Արցախու» աշխատութիւնը, «Հանդէս ամսօրեայ», 2006, թիւ 1-12, էջ 317-394* (այսուհետև շարադրանքում հղելու ենք այս հրատարակման էջերը):

² Մատենադարան, Հ. Աբրահամյանի արխիվ, թղթ. 98, վավ. 259:

գրական երկը, 1860-1861 թթ. ընդօրինակել «Անտառ այլաբանութեան» գիրքը³, 1862-ին ձեռնադրվել վարդապետ, իսկ 1865-ին՝ հրաժարվել միաբանությունից: Այլ տեղեկություններ նրա մասին չգիտենք:

Անցնելով Հ. Ջաքարյանի «Պատմութիւն գաւառին Արցախու» աշխատության ներկայացմանը, նախ նշենք, որ հայագիտությանը ոչ անհայտ Տ. Տեր-Գրիգորյանը «1940-ական թվականներին թարգմանել է այն ռուսերեն և տրամադրել Ադրբեջանի գիտությունների ակադեմիայի պատմության ինստիտուտին, որտեղ և պահվում է 924 թվահամարի տակ, ձեռագիր վիճակում»⁴: Հետագայում այս աշխատությանը նվիրված հոդվածով հանդես է եկել Ռ. Տիտանյանը⁵:

Հակոբ Ջաքարյանի «Պատմութիւն գաւառին Արցախու» աշխատությունը սկսվում է Արցախում վաչկատուն թուրքական ջիվանշիր ցեղի մի ճյուղի՝ սարջալլուների ցեղապետ Փանահ խանի հաստատման և Շուշիի բերդի վերակառուցման ժամանակներից: Այստեղ հեղինակը պարզորոշ ներկայացնում է Փանահի խորամանկ քաղաքականությունը հայերի նկատմամբ, որոնց մոլորեցնելու, պառակտելու, մի մասին իր կողմը գրավելու միտումով առերևույթ «բարություն, հանդուրժողականություն» է ցուցաբերել նրանց նկատմամբ՝ անտարակույս, հաշվի առնելով նաև Արցախի մելիքների գործությունը: Սակայն, հետագայում, ինչպես նշում է հեղինակը, երբ նրան հաջողվում է Արցախում ամրապնդել իր դիրքերը, ցույց է տալիս իր իսկական դեմքը: Հեղինակը չափազանց պատկերավոր է ներկայացրել Փանահ խանի՝ անառիկ մի վայրում բերդ ունենալու ցանկությանը Վարանդա գավառի տիրակալ Մելիք-Շահնազարի տված արձագանքը. «Կոչեաց խանն զմե-

ծամեծս եւ զիշխանս յերկուց ազգաց, ասէ ցնոսա՝ կամիմ զի բերդ մի տալ շինել, բայց չգիտեմ տեղի մի ամուր եւ յարմար. յառաջեաց Շահնազարն եւ ասէ՝ ցուցից մեծութեանդ լեռն մի, որ արօրադիր է գեղջին Շուշոյ. բաց ի տեղոյն ոչ գտանէք յայլ ուրէք ամրագոյն քան զայն՝ եւ ըստ կամաց ձերոց յարմար շինութեան բերդաքաղաքի» (էջ 330): Այլ աղբյուրներից հայտնի է, թե ինչու էր Վարանդայի տիրակալը իր մելիքության տարածքում գտնվող այդ պաշտպանական ամրությունը ավստի վրա մատուցում քոչվոր ջիվանշիրցուն, այստեղ կարևորն այն է, որ Հ. Ջաքարյանն այս տողերը գրում էր Ռաֆֆու «Խամսայի մելիքությունները» երկի լույս տեսնելուց մոտ երեք տասնամյակ առաջ, ընդ որում՝ երուսաղեմում, միանգամայն անծանոթ Անդրկովկասում այդ շրջանում գրված Միրզա Ադիգյոզալբեկի «Ղարաբաղ-նամե» և Միրզա Յուսուֆ Ներսեսովի (Հովսեփ Ներսիսյանց) «Ճշմարտացի պատմություն» աշխատություններից: Այդ առումով այս տեղեկությունն ունի չափազանց կարևոր նշանակություն:

Այնուհետև Հ. Ջաքարյանն անցնում է Շուշիի վերակառուցման աշխատանքների նկարագրությանը: Այդ մասին նա գրում է. «Եւ այսպէս յարին եւ ի քիրտն հայոց գոգցես կանկնեցան պարիսպք քաղաքին, եւ մեծաշէն ապարանքն խանին եւ ամենայն կազմուածքն, որ ի նմա»: Ապա հեղինակն ավելացնում է. «Յետ լրանալոյն շինութեան պարսպի եւ աշտարակաց բերդին անուանեցին բերդաքաղաք Շուշի, զի վայրն այն, որպէս յիշեցաք, ազարակ է գեղջին Շուշոյ, վասն այնր անուամբ գեղջին յորջորջեցին զքաղաքն» (էջ 331-332):

Կարևոր նշանակություն ունեն նաև Շուշիի բնակիչների մասին Հ. Ջաքարյանի հաղորդած տեղեկությունները. «Եւ մինչեւ ցայսօր ժողովուրդն Շուշոյ՝ որք յազգես մերմէ են՝ բաժանին ի չորիս թաղս կամ վիճակս՝ ագուլեցիք, ղազանչեցիք, մեղրեցիք եւ բուն ղարապաղցիք» (էջ 382): Հայտնի է, որ երնջակ գավառի Շահկերտ (Ղազանչի) ավանի բնակիչներից շատերը 1750 թ. Նախիջևանի Հեյդարկուլի խանի գործի դեմ

³ Լ. Պողարեան, Մայր ցուցակ ձեռագրաց Սրբոց Յակոբեանց, հ. 8, Երուսաղէմ, 1977, էջ 298-299:

⁴ Ռ. Տիտանյան, Նորահայտ նյութեր 1793-1795 թթ. Շուշի բերդի հերոսական պաշտպանության մասին, «ԼՂԳ», 1966, թիվ 9, էջ 29:

⁵ Ռ. Տիտանյան, նշվ. աշխ., «ԼՂԳ», 1966, թիվ 9, էջ 28-41:

մղած հերոսական պայքարից հետո հեռացել են Ղափան, իսկ հետագայում տեղափոխվել Շուշի⁶: Ագուլեցի վերաբնակիչները Շուշիում էին հաստատվել Ազատ խանի կատարած ավերածություններից հետո: Մեկ այլ, ավելի սակավամարդ գաղթականություն էլ Շուշի էր գնացել Սեղրիից: Նրանք Շուշիում բնակություն են հաստատել հայրենակցական սկզբունքով, իսկ նորաստեղծ թաղերը կոչել իրենց նախկին բնակավայրերի անուններով: XVIII դարի 80-ական թվականներին այդ հասարակությունների տարբերությունները դեռևս այնքան զգալի էին, որ Շուշիի հայ բնակչությանն իր հայրապետանալն ավետող 1780 թ. դեկտեմբերի կոնդակը Ամենայն Հայոց կաթողիկոս Ղուկաս Կարնեցին հասցեագրել էր «ի վերայ համայն նախիջևանցի, ղազանչեցի, աստապատեցի և այլ ամենայն ժողովրդոցն, որք ի դղեակն Շուշու զետեղեալ գոն»⁷: Ինչ վերաբերում է Շուշիում բնակություն հաստատած ղարաբաղցիներին, ապա նրանց մեջ մեծ թիվ էին կազմում Մելիք-Շահնազարի հպատակները՝ վարանդացիները: «Այսպիսով, կազմվեց մի քաղաքային համայնք՝ չորս իրարից տարբեր տարրերից, որոնք պահպանում էին իրենց տեղային առանձնահատկությունները»⁸: Եվ հենց այս չորս հասարակությունների բնակիչներն էլ ձևավորեցին ապագա շուշեցու դիմագիծը:

Ուշագրավ են նաև Շուշիի եկեղեցիների մասին Հ. Ջաքարյանի բերած տեղեկությունները: Այն ժամանակ, երբ Հ. Ջաքարյանը գրում էր այս երկը, Շուշիի Ղազանչեցոց Ս. Ամենափրկիչ եկեղեցին (1868-1887) դեռևս կառուցված չէր, և հեղինակը որպես իր քաղաքի ամենամեծ եկեղեցի է հիշատակում 1822 թ. կառուցված Ագուլեցոց Ս. Աստվածածին եկեղեցին: «Առաջին եւ հոյակապն է Ագուլեցոցն՝ կառուցեալ յանուն ամենասուրբ Աստուածածնայ», - գրում է նա (էջ 332-333):

⁶ Մ. Չամչեանց, Հայոց պատմություն, հ. 9, Ե., 1984, էջ 848:

⁷ Դիվան հայոց պատմության. Նոր շարք, գիրք Ա, Ղուկաս Կարնեցի, հ. Ա, աշխ. 4. Գրիգորյանի, Ե., 1984, էջ 173:

⁸ Լեռ, Երկերի ժողովածու, հ. 3, գիրք 2, Ե., 1973, էջ 272:

Այս մասին հաջորդում է «Պատերազմ շահին ընդ խանին Ղարաբաղու» գլուխը⁹, որտեղ խոսվում է նախ Սուլեյման սարդարի գլխավորությամբ 1793-1794 թթ. Արցախ ներխուժած պարսկական զորքերի պարտության, այնուհետև Իրանի Աղա Մուհամմադ խանի¹⁰ անդրկովկասյան արշավանքների, նրա սպանության և պարսկական բանակի խուճապահար փախուստի մասին: «Եւ ով կարէ պատմել, թէ որպէս ի միում ժամու այնչափ անթիւ զօրք նորա որպէս փախեան,-գրում է Հ. Ջաքարյանը,- թողեալ զգէսս եւ զամենայն պատերազմական գործիս եւս եւ զդի շահին իւրեանց» (էջ 354): Այստեղ հեղինակը հավատարիմ է մնում պատմական իրականությանը, իսկ Ատրպատականի Սուլեյման սարդարի՝ Արցախ արշավելու վերաբերյալ Հ. Ջաքարյանի տեղեկությունների իսկությունը ոչ միայն հաստատվում է ռուս պատմաբան Պ. Բուտկովի տվյալներով¹¹, այլև Սուլեյման սարդարի՝ «1793-1795 թթ. Ղարաբաղի Իբրահիմ խանի հետ վարած բանակցությունների ու նրա կատարած հետախուզական արշավանքների մասին պատմագրությանը հայտնի փաստերին Հակոբ Շուշեցին ավելացնում է շատ նորություններ ու մանրամասնություններ, որոնց չենք հանդիպում մասնավորապես հայկական սկզբնաղբյուրներում»¹²: Ապա թռուցիկ ներկայացվում է Վրաստանի միավորումը Ռուսաստանին: Այս հատվածի վերջում հեղինակը ներկայացնում է Քյուրակ-չայի պայմանագրի կնքումը, որը տեղի է ունեցել 1805 թ. մայիսի 14-ին¹³, սակայն սխալմամբ որպես պայմանագրի կնքման վայր է նշում Թիֆլիսը:

⁹ Այս գլուխը հրատարակել է Ռ. Տիտանյանը իր կազմած «Հայկական աղբյուրները Աղա Մուհամմադ խանի Անդրկովկասյան արշավանքների մասին (1795-1797 թթ.)» գրքում, Ե., 1981, էջ 205-222:

¹⁰ Նրա մասին տես Жизнеописание Ага-Магомет-Хана Каджара. СПб., 1835.

¹¹ П. Бутков, Материалы для новой истории Кавказа с 1722 по 1803 год. ч. II. СПб., 1869, с. 326-327.

¹² Ռ. Տիտանյան, նշվ. աշխ., «ԼՂԳ», 1966, թիվ 9, էջ 34:

¹³ АКАК, т. II, Тифлис, 1868, с. 705.

Այնուհետև, առանց ռուս-պարսկական 1804-1813 թթ. պատերազմին անդրադառնալու, հեղինակն անցնում է ռուս-պարսկական հաջորդ պատերազմի որոշ ուշագրավ դրվագների ներկայացմանը: Այդ մասը, որը կրում է «Յաղագս վիպասանութեան. յայտարարութիւն գործեալ իրաց Յայկազն Մատաթեան Յօհաննէս սպասալարի ռուսաց» վերնագիրը, նվիրված է զորավար Վալերիան Մադաթովի (Ռոստոմ Մադաթյան, 1782–1829) քաջագործությունների ներկայացմանը 1826–1828 թթ. ռուս-պարսկական պատերազմի ընթացքում¹⁴: «Անդրկովկասյան կորպուսի հրամանատար գեներալ Ա. Երմուլովը, որը մեծապես գնահատում էր Վ. Մադաթովի ռազմական փորձառությունը և անձնական քաջությունը, նրան նշանակեց հրամանատար այն ջոկատի, որը պիտի շտապեր կասեցնելու Աբբաս Միրզայի բանակի առաջխաղացումը»¹⁵: Այստեղ հեղինակը վիպական շնչով պատմում է 1826 թ. սեպտեմբերի 3-ին տեղի ունեցած Շամխորի հաղթական ճակատամարտի, Գանձակի գրավման և գեներալ Վ. Մադաթովի իրականացրած դարադադյան արշավանքի մասին: Ե՛վ Յ. Չաքարյանը, և՛ XIX դարի պատմագիր Միրզա Յուսուֆ Ներսեսովն իր «Ճշմարտացի պատմություն» երկում ոչ քիչ էջեր են նվիրել զորավար Վ. Մադաթովի գործունեության ներկայացմանը¹⁶: Սակայն, եթե Միրզա Յուսուֆ Ներսեսովը, գտնվելով Արցախ ներխուժած Աբբաս Միրզայի քեռու՝ Ամիր խան սարդարի զորաբանակում, հանգամանորեն ներկայացնում է պարսկական բանակում տիրող իրավիճակը, ապա Յ. Չաքարյանն իր հերթին մանրամասնորեն նկարագրում է Վ. Մադաթովի մարտավարական հնարք-

¹⁴ Այդ մասին մանրամասն տե՛ս Кавказцы или подвиги и жизнь замечательных лиц, действовавших на Кавказе. Жизнеописания ген.-л. В. Мадатова и ген.-м. Бурцова. СПб., 1859, с. 30–46, Կեանք գեներալ-լեյտենանտ կնեազ Մատաթովին, Շուշի, 1870, էջ 78–119, Жизнь ген.-л. князя Мадатова. СПб., 1874, с. 91–139.

¹⁵ Վ. Թերզիբաշյան, Գեներալ-լեյտենանտ Վ. Մադաթով, Ե., 1942, էջ 15:

¹⁶ Միրզա Յուսուֆ Ներսեսով, Ճշմարտացի պատմություն, Ե., 2000, էջ 105–137:

ները Շամխորի ճակատամարտում, որոշ լրացումներ ավելացնելով գոյություն ունեցող պատմական գրականությանը:

Այս մասին հաջորդում է «Յաղագս պեսպես վիպասանութեանց: (Այլ պատմութիւն): Պատմական վիպասանութիւն» վերնագիրը կրող մի հատված, որտեղ ներկայացված է հայ մարտիկ Պետրոս Չարքազովի սխրանքը Կովկասյան պատերազմում:

Աշխատության վերջում տեղ է գտել առաջին մասի մի ստվար հատվածի լրամշակված և խմբագրված տարբերակը, որը հեղինակը պայմանական նշանով և «տե՛ս երես 10, շարունակութիւն կրկին նախագիծ օրինակն գործոյս, այս նշանն և լից զպակասութիւն պատմութեանս, որ անդ կայ» գրությամբ մուծել է առաջին գլխի մեջ: Ըստ երևութիւն, հեղինակը մտադիր է եղել ընդարձակել իր պատմությունը, սակայն հասցրել է անել միայն այդքանը:

Վերջում նշենք, որ Յ. Չաքարյանի «Պատմութիւն գաւառին Արցախու» աշխատությունը զերծ չէ նաև փաստական որոշ սխալներից: Այսպես, Փանահի խանության սկիզբը հեղինակը համարում է 1780 թվականը, մինչդեռ նա, համագործակցելով Վարանդայի Մելիք-Շահնազար Բ-ի հետ, վերջինիս թողտվությամբ դեռևս 1752-ին էր հաստատվել Արցախի սրտում: Այնուհետև, ինչպես իրավացիորեն նկատել է Ռ. Տիտանյանը, «Շուշեցին ոչինչ չի ասում պատմական այն իրողության մասին, որ 1795 թ. ամռան վերջին, երբ Աղա Մուհամմադ խանին չի հաջողվում գրավել Շուշին, նա Արցախում թողնում է փոքր զորախումբ՝ պաշարումը շարունակելու նպատակով և ինքը հիմնական զորքով անցնում Վրաստան, գրավում և ավերում նրա մայրաքաղաքը: Չի ասված նաև այն մասին, որ Աղա Մուհամմադ խանի հրոսակները Թիֆլիսն ավերելուց հետո որոշում են ձմեռել Մուղանի դաշտում՝ գարնանը պատերազմական գործողությունները վերսկսելու միտումով և թե ինչպես ռուսական զորքերի՝ դեպի Անդրկովկաս շարժվելու լուրը հարկադրում է Աղա Մուհամմադ խանին թողնել Մուղա-

նը և վերադառնալ Պարսկաստան»¹⁷: Հ. Չաքարյանը հազվադեպ է նշում նաև իր նկարագրած դեպքերի տարեթվերը:

Իսկ զորավար Վ. Մադաթովի գործունեության նկարագրության մեջ որոշ դեպքերում նկատվում են իրադարձությունների հաջորդականության խախտումներ: Այսպես, Գանյունների հաջորդականության խախտումներ: Այսպես, Գանյունների գրավումը, որը տեղի է ունեցել 1826 թ. սեպտեմբերի 4-ին¹⁸, ներկայացվում է 1826 թ. սեպտեմբերի 3-ին տեղի ունեցած Շամխորի ճակատամարտից առաջ: Իսկ պարսից բանակը դեպի «բարեբեր կողմանս վերին հայոց»¹⁹ «զբոսանքի» առաջնորդողը ոչ թե Իրանի 1797-1834 թթ. շահը՝ Ֆաթալին էր, այլ նրա ավագ որդի, թագաժառանգ Աբբաս Միրզան:

Սակայն, այս ամենին զուգահեռ պետք է նշել, որ Հ. Չաքարյանը «բերում է Շուշի բերդաքաղաքի պաշտպանության այնպիսի հետաքրքրական մանրամասնություններ, որոնք բացակայում են հայկական մյուս աղբյուրներում, մի հանգամանք, որ առավել գնահատելի է դարձնում Հ. Շուշեցու «Պատմութիւնը»²⁰: Իսկ Հ. Չաքարյանի աշխատության մեջ առկա որոշ թերությունները, որոնք ամենևին էլ չեն նսեմացնում այս պատմագրական երկի արժեքը, թերևս առաջ են եկել իր նկարագրած դեպքերը հիշողությամբ վերարտադրելու պատճառով: Նկատենք նաև, որ հեղինակը ընթերցողների ներողամտությունն է հայցել իր երկում տեղ գտած հնարավոր անճշտությունների համար. «Զօր ինչ պատմեցաք եւ ունենք պատմել զգաւառէս ի լսելոց անտի ի հաւուց կամ ի հարց մերոց՝ զորս ի յիշողութեանս իմում մնացեալն էր ի բազմաց սակաւագոյնս գրեցի՝ խնդրեմ ներել, վասն զի քանի մի անուանք ի պատմութեանս փոխարկեալ են ի յատկութենէ իւրեանց. ի

¹⁷ Հայկական աղբյուրները Աղա Մուհամմադ խանի Անդրկովկասյան արշավանքների մասին, էջ 21:

¹⁸ Տե՛ս АКАК, Тифлис, 1875, т. VI, ч. II, с. 374:

¹⁹ Մատենադարան, ձեռ. 2734, էջ 15բ:

²⁰ Հայկական աղբյուրները Աղա Մուհամմադ խանի Անդրկովկասյան արշավանքների մասին, էջ 20, նաև՝ Պ. Չորանյանի գրախոսությունը Ռ. Տիտանյանի կազմած գրքի մասին, «ԼՅԳ», 1982, թիվ 6, էջ 100:

յիշողութեամբ լինելոյ զգործս եւ զանցս, որ ընդ նոսա՝ օտար անուամբ, յորջորջեցի զնոսա» (էջ 356):

Հ. Չաքարյանի «Պատմութիւնն» ընթերցելիս երևում է, որ նա գրողի ձիրք է ունեցել: Դա նկատվում է հատկապես պատերազմական տեսարանների՝ նրա պատկերավոր նկարագրություններից, երբ հեղինակի գրիչը պարզապես վերածվում է թշնամուն հայրենի երկրից վտարող մարտիկի: Նրա աշխատությունն ընթերցվում է մեծ հետաքրքրությամբ:

Ամփոփելով՝ նշենք, որ Հակոբ Չաքարյան Շուշեցու պատմությունը, չնայած որոշ ակներև չափազանցություններին, Վարդան Օձնեցու «Նոր քաղաքական և եկեղեցական պատմութիւն Հայաստան աշխարհի Մեծի և Փոքու»²¹ և Առաքել Կոստանյանցի երկհատոր «Պատմութիւն Արցախի»²² աշխատությունների հետ մեկտեղ կարևոր սկզբնաղբյուր է Արցախի XVIII դարի վերջի և XIX դարի սկզբի պատմության համար:

²¹ Մատենադարան, ձեռ. 4331:

²² Մատենադարան, ձեռ. 7822, 7823: